

11 MAY 2000

Mahathir-Umno (Azhar)

MAHATHIR GESA RAKYAT CONTOHI SEMANGAT AZHAR MANSOR

KUALA LUMPUR, 11 Mei (Bernama) -- Pelayar anak Malaysia yang pertama mengelilingi dunia bersendirian, Datuk Azhar Mansor, mendapat penghargaan khas hari ini apabila kisah keberanian dan kecekalannya dijadikan contoh oleh Datuk Seri Dr Mahathir Mohamad pada perhimpunan agung Umno di sini.

Presiden Umno itu berharap nilai hidup dan budaya luar biasa yang ditonjolkan Azhar akan diteladani dan cuba dimiliki oleh orang Melayu.

Azhar yang telah berjaya belayar seorang diri mengelilingi dunia pada tahun 1999, bukanlah sesuatu yang sanggup atau boleh dibuat oleh sesiapa sahaja, baik orang Melayu atau mana-mana bangsa di dunia.

"Tentulah ada sifat-sifat yang luar biasa pada Azhar. Jika ramai lagi orang Melayu memiliki sifat-sifat ini, bangsa kita tentu akan dapat menghadapi segala cabaran dengan hati yang tabah dan kental.

"Juga tidak kecewa dengan kegagalan tetapi akan bangun dan cuba mengatasi cabaran sekali lagi dan sekali lagi sehingga berjaya atau hancur musnah kerananya," kata Perdana Menteri semasa merasmikan perhimpunan agung Umno ke-54 hari ini.

Dr Mahathir berkata persepsi sebahagian daripada orang Melayu terhadap kejayaan Azhar bagaimanapun ialah, ia bukan disebabkan sifat-sifat istimewa yang ada pada Azhar, sebaliknya mereka bertanya Azhar apa ilmu yang dipakai olehnya.

Presiden Umno itu berkata pada zaman dahulu ilmu yang dimaksudkan ialah ilmu ghaib termasuk kononnya membela hantu, pelesit atau pontianak tetapi sekarang ilmu yang dimaksudkan ialah ayat-ayat tertentu daripada Al-Quran yang dipercayai boleh melindungi seseorang daripada bahaya dan juga menentukan kejayaan.

"Kita orang Islam perlu membaca doa dan meminta pertolongan Allah Subhanahu wa Ta'ala tetapi kita tahu bahawa Allah tidak akan menolong kita jika kita tidak menolong diri kita sendiri," katanya, yang memetik ayat 11 Surah Ar-Ra'd yang bermaksud:

"Sesungguhnya Allah tidak mengubah apa yang ada pada sesuatu kaum sehingga mereka mengubah apa yang ada pada diri mereka sendiri."

Beliau berkata membaca doa semata-mata tidak mungkin membolehkan Azhar belayar mengelilingi dunia. Beliau perlu belajar segala selok belok pelayaran -- bagaimana menggunakan berbagai-bagai alatan dan bagaimana menjaga keselamatan dirinya.

Menggambarkan cabaran hebat yang dilalui Azhar dalam pelayarannya selama 192 hari dari Langkawi melalui Tanjung Pengharapan dan kembali ke Langkawi, Dr Mahathir berkata suhu lautan yang begitu rendah, laut bergelora dan ombak kadang-kadang 60 kaki tinggi.

"Tidak ada kawan untuk menolong jika ia sakit atau terlalu letih. Tidak ada sesiapa untuk berbual... kita dengar dan kita nampak macam-macam. Hanya iman yang teguh dan hati yang kental yang boleh memberi kejayaan kepada pelayar daripada bangsa kita ini," katanya yang disambut tepukan gemuruh anggota perwakilan Umno.

Dr Mahathir berkata beliau tidak mencadangkan supaya semua orang memiliki kualiti budaya yang ada pada Azhar tetapi sekurang-kurangnya mereka hendaklah sedar dan faham bahawa Tuhan hanya menolong orang yang menolong dirinya.

"Bacalah doa dan ayat-ayat tertentu, tetapi kuasailah juga ilmu-ilmu yang berkaitan secara langsung dengan apa juga yang diusahakan oleh kita. Kecekapan dalam ilmu-ilmu ini tidak boleh dipandang ringan kerana kita sebagai orang Islam boleh meminta pertolongan Allah Subhanahu wa Ta'ala.

"Kita perlu akui bahawa orang yang tidak boleh meminta pertolongan juga berjaya, bahkan lebih berjaya daripada kita di dunia ini. Tetapi jika kita ingin menjadi angkasawan yang akan mendarat di atas bulan, kecekapan

tertentu mestilah ada pada kita," katanya.

Dr Mahathir berkata kegagalan orang Islam ialah kerana setelah Tuhan menjadikan mereka umat yang terpilih, sebaik-baik manusia, mereka berpendapat mereka tidak perlu berusaha lagi kerana segala-galanya akan dikurniakan kepada mereka oleh Allah.

Beliau mengingatkan walaupun Allah boleh menjayakan Nabi Muhammad SAW dalam mengembangkan agama Islam hanya dengan berkata "Kun, fayakun" tetapi Baginda Rasullullah SAW terpaksa menghadapi bermacam-macam cabaran dan berhijrah melintasi padang pasir untuk menjayakan tugasnya.

"Sebenarnya budaya, nilai hidup dan kualiti yang dianggap perlu ada kepada orang Melayu boleh menjadikan mereka Melayu Baru, Melayu yang boleh membendung nafsu dan nilai-nilai yang buruk yang telah menakluki mereka setelah meninggalkan kampung mereka dan menikmati kemewahan hidup di bandar," katanya.

Perdana Menteri melihat Melayu Baru sebagai Melayu yang berpegang kuat kepada agama Islam dan nilai-nilai murninya, berdisiplin dan sedar bahawa Tuhan hanya akan menolong mereka yang berusaha dan belajar serta menguasai ilmu-ilmu yang boleh menjayakan mereka.

Secara mudah, beliau mengkiaskan bahawa Melayu Baru ialah orang Melayu yang akan terlebih dahulu mengunci keretanya sebelum meninggalkan kereta itu dan berserah kepada Allah.

Menurut Dr Mahathir ada pihak yang cuba menggambarkan Melayu Baru sebagai tahi arak, kaki perempuan dan kaki judi.

"Kita tahu bahawa ini bukanlah Melayu Baru yang dimaksudkan oleh kita. Ini adalah ciptaan orang yang dirasuk syaitan untuk menggagalkan orang Melayu," katanya.

Beliau berkata Umno sebagai parti yang berjuang untuk bangsa, agama dan negara bertanggungjawab untuk memperbanyakkan bilangan Melayu Baru tetapi permulaan hendaklah dibuat di kalangan pemimpin dan anggota-anggota Umno supaya mereka akan menjadi Melayu Baru sebelum orang lain.

"Apabila mereka sudah berjaya membendung nafsu, mendisiplinkan diri dan menerap nilai-nilai yang mulia dan berkualiti dan menjadi Melayu Baru, maka layaklah Umno mengembangkan budaya Melayu Baru di kalangan orang Melayu lain. Insya-Allah pemimpin dan anggota Umno akan menjadi layak," kata Perdana Menteri.

-- BERNAMA

MNY RON